

四庫全書

集部

欽定四庫全書

宋詩鈔卷五十六

內閣中書舍人吳之振編

程俱北山小集鈔

程俱字致道衢之開化人以外祖鄧潤甫恩補官坐  
上書論紹述罷歸宣政間進頌賜上舍出身歷官禮  
部郎建炎直秘閣知秀州南渡航海趨行在紹興初  
為秘書少監時庶事草創俱撫三館舊聞為書曰麟

臺故事上之擢中書舍人兼侍講旋除徽猷閣待制  
晚病風痺秦檜薦領史事不至卒年六十七為文典  
雅閎奧詩則取塗韋柳以闕陶謝蕭散古澹有忘言  
自足之趣標致之最高者也

雜興十首

一日復一日百年如此耳那將千百計來日何窮已逝  
者不可追來者安可知正恐聞道晚勿言功用遲  
誤點成駸牛妙技有餘賞作意畫蛇足至今猶撫掌君

看人間事類此或往往浩歎可奈何悠悠起遐想

中夜忽自省昔我今是非音聲故如昨齒長鬚滿頤有  
人夢中言子念無乃癡今猶昔人耳昔人安在茲

濯濯簷下溜刀刀樹間鳴蟲號百鳥鬧小大各有聲聲  
多不留礙響振元無形何殊百千炬光影各自明

胡葵向晨照日引一尺長松栽四五年擢幹未出牆溥  
溥露方晞借此顏色芳各留一寸心試待九月霜

春鳩一何拙社燕一何巧天陰逐其婦飲啄聊自了銜

泥亦綢繆託此華廈好物生固有分巧拙均一飽

穊穊新橐結補此茅屋漏問云力田人歲事苦耘耨終  
年手足胝得此以自覆香杭一過限糠覆餘滿竇

昔年過吳江戀戀不忍去臨江塵思盡廓若歸翳霧茲  
為三年留已厭波濤怒乃知常人情趣新方捨故

軋軋田邊車卷卷不得休出一寸痕益以幾尺流扶提  
暴中野強作田家謳車聲真哭聲天遠將誰尤

少小思振奇頗恨身不長身長益多累信與憂俱生回

思二紀間浪使倏忽爭誰能補黥劓反我孩與嬰

吳縣遊靈巖

春物已如許放舟出橫塘扶橈漾潒漲迨此白日長  
草木有佳色欣欣弄浮陽幽禽靜相呼乘和自翻翔  
春風不著人浩浩吹我裳終年思煩促於此興未央  
捨舟得平地陟彼萬仞岡明霞墮山西夜氣鬱已蒼  
豈無從我遊夾道鬚髯張風來得好語落落隨低昂  
幽堂掃禪榻靜對燈燭光身輕浴新出境寂慮欲忘  
虛窗忽含曉睡

起日照梁羣山發春姿秀碧澹以芳晨光晞薄露草樹  
滋幽香徜徉尋昔遊步屨循長廊振衣一長嘯寸目了  
八荒上嗟百世基竟坐一笑亡

見劉禹錫詩

當時館娃地今

作選佛場乃知諸夢境適化豈有常飄然詠歸歟此適  
頃未嘗重來會有興宵使墮渺茫旁人挽予言偕問身  
閒忙吾方有公事子去無相妨

過方子通惟深

白日苦易晚我懷多隱憂憂思劇春浸浩漫不可收出

門欲有適舉步且復休塵中等膠擾念此將焉投駕言  
城東北閭閻即巖丘是有幽人厲志凌霜秋寸田荆  
棘盡不假斤斧修門無雜車馬一飯乃見留虛堂芝朮  
香下有百尺虬蒼陰匝平地老幹森下樛堂中羅酒漿  
耿耿燈燭幽四天黹無光萬籟肅以曄炯然坐相向更  
僕語益道我身動乖忤夢寐喬松遊常恐在泥滓永為  
天所囚會當從之子濯足萬里流

夜半聞橫管



秋風夜攪浮雲起幽夢歸來度寒水一聲橫玉靜穿雲  
響振疎林葉空委曲終時引斷腸聲中有千秋萬古情  
金谷草生無限思樓邊斜月為誰明

讀神仙傳

騎龍上天入太清繼世而往在我盈握鈴而呼大司命  
主非使者走折脛乃知神仙非智巧積功累行如邵鎬  
專懷邪辟祈長年誰言淮南雞犬飛上天

鯉魚腹中有隱符白魚腹中有素書鞭靈走石纔一戲

騎麟上天亦徒爾誰能解衣沕水中使人呼指赤鯁公  
莫作龍眉山頭客三百年不得作直故應未辦作李公  
投身百斛旨酒中鼓琴先生有怒色有愛終當為物役  
江都王勿預人事保蟲膏血使誰從汝索

胥門著蔡經市門著梅福我為松江吏與汝相望亦相  
逐高冠長劍衛士從有口底事使蠟封此身況不為陳  
尉就公蠟封三尺喙不能擲米作珠為狡獪

古釣臺歌送阮閱休美成公檄浙東

餓夫一往西山空攫金  
胠篋清晝同東方作矣事何若  
玉桺未解裙襦中排肩炙手日  
卓午暮夜掉臂目送西  
飛鴻謂言冰壺不受汙正似馬  
耳經東風我思一人去  
我千載乃在淞水之東富春瀨  
山嶽嶇兮矗雲漢溪流  
喧阗白石亂瀨聲盡處萬尋碧  
蟠蜿蜒兮守斯人之故  
宅旁人指山名釣臺下視九土  
氛黃埃投竿百轄何足  
道直拂三珠挂瑤草彼一人兮  
皎獨立清風為神水為  
骨佩瓊蕤兮結明月初蘅蘭以  
薦枕兮服龍淵之無缺

羊裘蒙茸溪水旁大勝被袞升明堂劉秀發兵誅不道  
氣壓昆陽纔一掃登牀撫腹坐太息始信赤符非至寶  
君房素癡定不癡致位鼎足何其危阿諛順旨腰領絕  
安知直言身見殺我昔客新定挂帆七里灘整冠拜祠  
下巖巖千仞層臺巔神遊八海極髣髴聆其語但覺萬  
古松風寒滔滔舉世無不可正自喪我非毋我嚴灘水  
清山翠微貪廉懦立歸來兮奎蹄絮縫不可以久棲

即事戲作四首

老鳥作巢一何拙柳條垂絲今禿缺銜枝復墮苦饒舌  
編條作巢枝錯節老鳥柳好汝勿傷藏鳥待得春葉長  
安巢令汝著哺母密葉更能庇風雨

齋前數柳樹為老  
鳥取新條作巢幾

盡

黃雀黃雀飛相逐相呼門前啄遺粟啄粟飽即休有人

挾筴埽泥待作粥

數日門外輪苗遺粒狼戾黃雀喧集  
貧家小兒爭埽去謂之埽泥米

鶴唳固有似云何啄泥取蚯蚓蚯蚓食泉曾不惡鰕鉏  
蜿蜒尤不忍何如忍飢向芝田腥涎溷爾不得飛上天

畜一鶴頗食  
腥穢可厭

烏啼未必惡魔去恨不早鵲噪兩耳聾主人亦言好安  
知一喙鳴喜戚自顛倒朝來羣鵲噪不已童稚無知助  
吾喜羣鵲自與烏爭巢慎勿喜歡真誤爾

齊前羣  
鶴時噪

### 謝人惠硯

帝鴻墨海世不見近愛端溪青紫硯溪流見底寒且清  
光凝淺紺淵之精斧柯千古遺仙局雲暗半山含紫玉  
割雲鏡玉巧如神龍尾銅臺可奴僕君來自南數千里

不載珠璣如薏苡芊芊溪草裏石硯文字之祥直送喜  
明窗大几墨花春爐山吐蘭千穗雲虛中含默靜相對  
那復草玄驚世人

劉禹錫有端溪石硯人間  
重贈我應知正草玄之句

穹窿葬事回邑有感

生別萬里餘會面終有期死別不轉眸一朝千古非白  
日光在天玄陰閭泉扉盈盈閨中秀土化成枯髑冠笄  
共甘苦謂見素髮垂那知死生變不待桑蔭移室有病  
時茵篋有嫁時衣了了眼中事閒妝靜容儀垂楊手曾

折為我當春稀  
迅流無迴波  
落英無還枝  
空房閒無迹  
新墳草離離  
傷心北門道  
同來不同歸

過劉姓園居

負郭三頃稻並田  
五畝園人生如此足  
安用華其軒  
親戚居南陌  
交遊在東村  
有酒輒共醉  
傾輸見情言  
三徑雜桃李  
九畦蒔蘭蓀  
黃甘百頭奴  
碧梧萬枝孫  
山供景無盡  
石映溪不渾  
桑麻中饋任  
布刈鄰翁論  
下以活妻孥  
上以奉清溫  
時從赤松子  
亦訪吳市門  
嗟我抱此志  
十



年若朝昏家山渺天末松菊豈復存茲園臨官道坐笑  
車馬奔前山復場圃疏築隨坳墩我來適春穠亂眼紅  
青紛恍然動鄉思夢寄東風雲

題海會寺

萬杉堆青沒山骨雲埋七峰時出沒飛泉拂石瀉哀湍  
下有萬古蛟龍窟藏頭睡熟呼不起地圻三年蝗蝻出  
千山脉理漬清甘一罇涓涓流石液同遊况與惠詢輩  
許主簿  
遠首座  
納屐振衣何勃窣大門當前新築道跨水曲欄

鼓突兀春鳴軋軋起朝炊水厶懸流機械發摺筇對此  
自三歎抱甕老人長揖揖却坐幽堂忽浩歌回首已失  
西山日

望九華

船發大雲倉五十里許顧江南衆山中有數峰奇爽  
特異一見即知其為九華問篙人果然因知褚季野  
於廣坐中識孟萬年正應如此作詩一首

卷簾對坐江南山掠眼送青來疊疊雲泉肺腸久厭飫

拄頰悠然聊復爾奇峰遠澹忽四五秀爽駸駸逼窗几  
平生九華盛名下一見定知真是矣非關目力覩天奧  
正覺羣山如聚米好山如人有高韻不獨江州孟公子  
直緣佳處無仕逕落莫道邊同苦李大是忘年耐久交  
藜杖青鞵結終始

山中對酒

秋容澹青山爽秀雨皆足清溪照千仞空翠疑可掬何  
年顧兔窟桂子墮山腹老香散深林屑玉綴黃粟朝來

客衣動一葉下空谷客心如棼絲日月共煩促  
胃中尚磊塊陶寫賴新淥要當酒千鍾澆我愁  
萬斛顧有獨醒人脩然倚枯木

二月二日富陽城東

一春何許最佳處柳色初勻思殺人風揉雨練不可觸  
明綠映空顏色新舊雨來時花未齊今雨一過花團枝  
明朝試踏城西路已復可憐枝上稀

桐廬道中書事

一星熠熠初向微俄頃滿天如灼龜溪流黯黯四山黑怒  
芒當空唯太白舉頭仰書天漫漫飛星縱橫絕河漢新  
月未高不可見終夜起坐發三歎

題張太丞明園亭

京華真陸海聲利之所闕向來山林士往往去不還濡  
足未肯已沒身何足歎張侯翰林客金龜著朝班生平  
用一指談笑起廢殘紛紛多盧子名譽莫敢攀五十未  
云老憊然歸故山歸來謝奔走治此五畝園養樹如養

生斤斧不浪干醫花如醫疾察標見其源

花譜有醫花法

上有

十圍木蓊然午陰寬下有百步荷紅鮮映清瀾爽氣日  
多佳西山挂簷端安能九衢內髀肉磨羈鞍我今坐奇  
窮進退坎井間違己恨紆轡長飢思抱關當時彭澤令  
四壁唯瓢簞折腰未為辱徑去曾無難而我亦何者栖  
栖猶強顏

送崔閒歸廬山

琅琊山中水韻入三尺桐琅然醉翁操發自玉澗翁流

泉不成音寫寄十二宮醉翁不可見妙語聊形容嘗聞  
三峽泉上與天漢通請君記餘響相彼玉珮風此聲倘  
可繼那復有此公

吾友胡少汲結廬皖公城瀟山有小隱背負紫翠屏前  
臨一溪水可以濯我纓欲分青山半留我谷口耕信美  
非吾鄉翩然遂宵征聞君草堂處亦復占地靈虛簷倚  
蒼崖不有玉澗鳴樂哉不可到因君懷友生

有美一人

有美一人在昭君藕絲為衣蘭作裙君初顧言淑且真  
直欲載以黃金輪人心變化如浮雲明妝覺暗笑作顰  
何當還之承華茵今君宴寢凝清芬

有美一人在煙汀朱顏朝滌玉壺冰素手暮理朱絲繩  
語言窈窕丹鳳鳴坐持紈扇睇秋螢何當還之翡翠屏  
為君把鏡整衿纓

有美一人在南浦月明採珠光照渚瑤衣被體金索縷  
獨抱幽寒沫煙雨何當置之白玉宇為君歌陽春激楚



有美一人在南國以下四首亡時鄒志完  
在昭州曾子開在汀州陳瑩中在合浦

賦長興錢圃翁詩

學書要不成學圃苦不早向來執戟郎何似於陵老我  
無孥雲意所念在一飽閉門種蕪菁抱壘澤枯槁荒畦  
財一席嚙嚼到春草頗聞長城翁八十顏色好城西有  
寬閒終歲常却掃安得五畝園如翁一生了

遊善權寺

放舟荆溪上溪水清且徐雲中離墨山慘淡初有無捨

舟並松麓下直浮屠居謁來東軒上爽氣已有餘飛來  
定何年無乃與此俱奔流漱庭下比竹梁寒渠山深絕  
凡境物物清以臞蕭森倚巖秀天矯懸崖枯幽禽發寒  
唳響振高林疎我行亦良苦却步計已迂解衣卧清晝  
尉我千里劬

予自衢來姑蘇省女兄竟欲歸却行二百  
七十里訪江仲嘉於宜興故有却步之句

### 善權洞

嘗聞包山境中有林屋天旁通號地脉嶽瀆潛鈎連茲  
山豈其類瀕洞皆中穿二巖岌山足琤淙激奔泉牛羊

走大石吐受無窮年金堂下石液雪積如烹煎從來米  
鹽稱浪播俚俗傳一洞啓山腹穹窿亦聯綿誰題九斗  
字大篆仍深鐫中藏丈五石屹若龍騰淵回頭問主人  
謂仲嘉我輩定不凡云何逐官牒常得我所耽向來共幽  
討九鑠藏芝巖而我自林屋翩然游皖瀉洪崖儻可脩  
不在南山南

白馬洞

披榛不知疲詰屈巖下路俄然見深竅偶步入巖戶一

泓窈而澄百步清以驚人言紫髯仙白馬從此度磷磷  
盡赤石丹竈遺滓汙收藏已兒啼效速勝麻護因知世  
盲聾荒怪雜疑誤虛空如許大長嘯可平步胡為萬山  
底躑躅向煙霧

神魚泓是日與諸公流杯中如西丘故事

柳州固奇士戲好亦幽絕遠懷西丘飲千古清興發徬  
佯恨無所盤俎對羈紲聊為五里行邂逅一壺挈神魚  
伏山根渟湛初一穴侵侵決寒溜沙石助清越披莎得

盤石離坐若天設，實觴競乘流。眩轉亦飄瞥，爭持或三  
醵。遇坎時一蹶，歡來朱碧亂。笑罷巾帽脫，相望西丘游。  
詎易議優劣。

張公洞

昔年京江夜飛夢，投雲山仍追謫仙。老嘯詠層崖巔，左  
盼俯無地。蒼巒生紫煙，當時賦幽賞，妙境竟莫宣。今我  
來自東扶橈，漾荆川飽聞張公洞，怪絕駭所傳。聊從二三  
子，一結青山緣。北靈敞奇觀，下矚壺中天。恍然驚昨夢，

了了墮我前仄徑繚危棧重扃護靈淵奇礪玄坂倚側  
洞時鈎穿初疑天台聚納此一室間夸娥運神化不隘  
亦不顛又疑清都客翩然下雲輶幢旄儼行立導從森  
蟬聯丹梯香霧濕玉室珠璣懸撐虛一柱屹戴重三能  
騫鉞竈久已冷青驪那可鞭香壇望八景東晨開五便  
坡陁忽度險宛轉漫無邊或深如列厦或迤纔容肩高  
躋乍捫頂偶步欲墊泉不知行遠近一步目九遷噫嘻  
此天設端在太古先恨無少陵手寫之黃絹篇聊書夢

中夢投筆一粲然

公羊繫  
然皆笑

借居毗陵東門四首

客去不能寐，脩然清夜闌。  
樓居俯長川，仰視天宇寬。  
長川濯雲漢，錯落星宿寒。  
青燈故可親，且還對塵編。  
其人骨已朽，千載與我言。  
掩卷三太息，虛簷清露溥。

急景不可挽，吾生豈無涯。  
吳中十年舊鬚髻，亦已華嗟。  
我壯且老，方知失林鴟。  
欲歸巷無廬，欲駕塗無車。  
而子亦羈滯，心事如蓬麻。  
人生無巧拙，命爾將如何。

吳中十  
年舊謂

傳冲  
益

猗猗隔河樹，翳翳緣堦草。時常長養候，顏色豈不好。萌  
芒忽柯葉，茂大旋枯槁。滔滔不自知，但見壯而老。人生  
亦草木，萬化迭侵擾。朱顏日夜變，素抱豈自保。

借居臨官道，堂陰俯長河。前輩接來軫，後棹紛相摩。我  
獨居其間，超然嘯而歌。頗從故人語，安用高軒過。旁有  
五畝園，不知主誰何。時能曳屐往，豈異吾山阿。

和柳子厚讀書



事賤反多暇居卑適無虞人間不爭地聊此謝畏途豈  
無營營子熟視付一吁屋中亦何有坐聽日月逾展卷  
閱千古置書忘萬殊不妨權子母亦復商有無平生僅  
識字乃與憂患俱持此遊學海層臺漸積蘇年來但遮  
眼頗覺心恬愉囊錢足自飽肯怖駟朱儒起卧一塌間  
兀如檠株拘涼風北牕下不減愚溪愚誰能三萬卷懸  
頭苦劬小極正當寐睡魔不須驅

戲呈虞君明察院謦

三仕三已心如空一畝一丘吾固窮門施雀羅正可樂  
室如雞栖良不惡胸中九華初欲成綵衣玉斧雙鬟青  
世間何樂復過此不失清都左右卿

長安陸海如洪爐五金出入無精粗平生椎鈍堅重質  
一往融液隨流珠請觀五石大瓠種正以濩落浮江湖  
環中何者為榮辱千鍾何如三釜粟坦途緩步東方明  
大勝跨虎臨深谷

秋夜寫懷呈常所往來諸公兼寄吳興江仲嘉八

首

秋聲不關人倦客偏入耳蕭蕭舞黃葉策策振疎葦  
明知壯則老搖落固其理如何石心人慨歎中夜起

蓬蒿沒三徑藤蘿上瓜廬時聞步屨聲款關問何如  
定坐無雜語文章較精麤馬融辭東觀抗讎與世疎顧此

窮巷士華顛空著書

屬王元  
規防

外監嗟已遠吾猶識其孫森然見孤韻辯作懸河翻  
低頭向螢窗有類鶴在樊讐書五千卷字字窮根源頗攜

未見書過我樵無煙

屬賀方  
回鑄

向來霜秋句俯仰歲一終人間有寒暑方外無窮通青

青千丈松不改冰雪容坐閱蒲與柳飄蕭隨雨風寒松

老益高蒲柳老益衰流萍況無蒂復與飛蓬期却埽計

不早出門欲何之

屬方子通惟深余壬午歲常過子通  
賦詩有云是中有幽人厲志凌霜秋

又云會當從之子濯足萬里  
流俯仰十二年矣愧此高人

剝啄驚午枕軒昂見長身蒼髯如修竹定非俯仰人德

公卧襄陽不踏官府塵此老頗似之酒酣見天真結廬

甚幽獨已辦老圃披榛時一來數面久益親

屬楊彝父懿孺

二士出吳下諸生有楊王相從寂寞濱無乃計未良縱  
橫三千字坐可致玉堂詞章乃糠粃不直粟一囊我媿  
非子雲文書昧偏旁窮居似韓子草樹亦荒涼時能出  
佳句慰我秋夜長

屬王楊  
二貢士

物色一如此淒風薄人衣遙憐下山客增歎雉朝飛固  
知難為懷舉餐念齊眉勿使梨棗間纏綿生繭絲

清霜埽蕃廬豈為一草木方春萬物遂苑籞及冰谷乾

坤本平施憎愛豈有屬不應懷偏慳獨遇吾黨酷奇窮  
坐迂疎此事計已熟如何半世間生理常刺促

二篇屬  
江仲嘉

仲嘉有氣節多難比  
有伉儷之戚故云

### 夜坐

飢鳥夜啼棲復起  
乞粟飛光透窻紙  
捲簾萬瓦白生煙  
竹影扶疎淨如洗  
回腸正隨清漏轉  
葉下空庭亂如霰  
青燈耿耿夜何其  
雲篆吐蘭初一線  
歲云暮矣萬竅號  
霜天鳴鴈求其曹  
月行虛空幾萬里  
羣犬吠光聲正豪

蒲團瞑目空危坐逝者如斯白駒過悠悠昨夢不可攀  
此身此心何日間

春日寫懷

春風遍芳華一國盡狂醉窮閭獨不知但見長蒿薺秋  
颺起蘋末一華初未墜幽懷獨先覺意象已淒厲故知  
春與秋初不為我計危絃自應悲寒木終易脆要之夢  
中夢憂樂同一寐翻然詠軒丘心量浩無際

豁然閣

雲霞墮西山飛帆拂天鏡誰開一窻明納此千頃靜寒  
蟾發澹白一雨破孤迥時邀竹林交或盡剡溪興扁舟  
還北城隱隱聞鐘磬

讀陶靖節詩

吾觀靖節詩三歎有遺音卧看起詠之惓惓澹多心欲  
學靖節詩慎勿學其語心源如古井衡氣光發字言無  
出言意妙語自天與譬如清泠淵月湛不可取欽崎阨  
驚湍乃若震雷鼓斯言可深味往往棄如土



到官兩旬四走山野作詩以自勞云

上山偃仰如望天下山偃仆如深泉胡為持此不貲寶  
來試萬丈懸崖巔前人見踵後見頂反足鳥道相攀  
牽欵然置我章貢上水激石罅奔雷填荒塍曲澗無遠  
近渺渺不見墟中煙土岡鑿路狹如隧蘇壁藤薜蛟虵  
纏寒風颼颼失白日上有萬木蒼陰玄船溪之深揭其淺  
碎石齧足聲號川茗山發我一長喟彼有吳市中仙  
飛瓊練玉存故處秋有井竈無霜鉉我今正坐五斗米

悔不辟粒從期佺向來吳松厭羈旅三歲半逐鷗夷舩  
故教堯庫著疎嬾坐守兀兀聊窮年安知求逸得奔走  
豈異避挺蒙戈鋌咄嗟萬事無必計努力唯有歸園田

按圖經茗山有梅福鍊  
丹竈故有飛瓊之句

九日雨中對菊忽忽塊坐用雨中對花韻三首

胷中有天游一室未為迫永懷東籬翁那復有此客重  
陰敗佳辰長雨不為澤堆甌對黃華菜色被減獲黃華  
亦蕭條伴我雙髻白猶能相啣濡嫩葉供小摘

去年蛾眉山痛飲真得計新蟾繼秋陽明潔謝點綴今年坐蝸廬簷溜落空砌花開信多雨會少苦分袂茫茫大塊間游子況無帶百年能幾向行復驚改歲

急心如危絃未斷先凜凜風庭忽知秋中夜不安枕力行無遠途積縷成重錦男兒未蓋棺雅志安得寢榮衰非所念身世固已審亦復羨生久聊為老錢飲

魏文與鍾繇書

云屈平悲冉冉之將老思餐秋菊之落英輔體延年莫斯之貴謹奉一束以資彭祖之術

元夕塊坐因用葉翰林去年見寄元夕詩韻寫懷

兒童逐遨戲先春禱春晴心如飄風快目若冰壺明寧  
為惜日計所願佳節并老來見紛麗如乾闥婆城流光  
不可挽譬彼空中聲那知節物佳脩然謝將迎幽燈對  
簡編歷歷記所更斯須閉關卧鼻息驚雷鳴寤念北山  
北田家已催耕胡為異鄉久空寒猿鶴盟短日良易暗  
凝陰有時晴何人勸之照燭燎皆爭明今年春苦寒寒  
威劇幽并連綿積三白雲埋闔廬城深泥決新雨行路  
無人聲藜燈不來下箕卜豈復迎朝來日照梁天氣忽

已更稍聞橋市間蕭鼓遠近鳴吳人尚游樂急如赴春  
耕唯有窮巷士守窮如守盟

西安謁陸蒙老大夫觀著述之富戲用蒙老新體

作

大人意何長縱目文史足琅然五行落洞視不再讀作

書兼遠焚衆妙探玄竺

公作莊頌綴  
若頌數百篇

時時歌四始笑捧

五經腹高堂發新稿重複羅籤軸觀之類窺管諷味得

膏馥

蒙老號為連韻  
如云風捧諷韻

白頭書生黑頭翁長安時花幽澗松遠飛近啄雖異志  
天命厚薄無雌雄鉤深采博燥喉吻守此一畝蓬蒿宮  
杜門不出交二仲木陰澗曲遙相通紫囊貝葉資藝苑  
款關一見踰三冬亭亭漫吏多所歷乾死書螢心似漆  
王門賓閣不留行赭顏跣足搜泉石茅簷正欲結雲根  
竹葉榴花薦餘漑當從元亮賦言歸木茹麻衣永投筆

蒙老號為合離藥  
若如當歸木筆

十月五日集季野家歸作

賢愚孰無營急景信可惜如何闔廬城乃有此間客懷  
安豈初志運甍有餘力相從無何鄉邂逅一日適虛窻  
得朝陽寒凜作春色琴書羅棊几一一淨如拭畫沙見  
奇蹤落屑非近識似追永和還未覺正始隔崢嶸衡霍  
囿莽蒼雲夢澤時華玄低卬幽鳥共深寂誰驅此變幻  
戲納方丈域慚公慶春釀澆我憂思積豈無車公語謂方  
回顧匪伯仁自謂長繁蠟華推起視霜月白酣歌美清  
夜擁髻侍通德參差吐幽妍鑿落豔芳碧觥籌不留行

為問此何夕言歸謝主人五斗安可極

戲示江協律漢

酸寒北山尉憔悴孔州守枯魚同處陸濡沫賴詩酒當時年尚壯意氣亦何有祇今雙鬢華十載一回首仕初君似遇遊倦吾已醜邂逅記昔遊空嗟漢南柳

江再和戲答

當年季將軍晚節河東守誰令一人譽揮去坐使酒長卿起遐陬落筆賦烏有要之乃雕篆意不在黔首窮通



付造物世俗浪妍醜何必送五窮呼奴結車柳

空相僧舍書事

午景入疏竹堂陰筠粉香疏簾撲空翠無風自微涼  
磬聲破禪寂日轉幡影長霏煙觸垂瓜泛乳搜枯腸  
投局起尋勝徘徊雨花堂巢蓮見靈龜信有千歲祥  
徐觀乃跛鼈圍圍循菰蔣笑罷能歎息是非可兼忘  
却坐對談塵水松想千章斯須二三子矯若驚鴻翔  
府中有料理不作功曹狂

杜甫為功曹云束帶發狂欲大叫簿書何急來相仍是日江趙潘以幕職事去

戲贈江仲嘉司兵

君不見謝公栖遲樂東土起作司馬征西府  
莫年談笑有穰孫鶴唳風聲走強虜  
又不見子猷剡川高興闌肯隨鶴書  
落人間不知騎曹底官職朝來拄頰看  
西山平生清真翠嵒老泉石膏肅偶同  
調歲寒落落見孤松不忍低眉寧枯槁  
年來無米繼朝炊聞說吳興富魚稻不  
妨來作古司兵士卒投膠止見藻美哉  
洋洋雪溪水秋塘百里荷花繞當年釣  
徒放浪處醉目悠然送歸鳥斯

人不死世不識往往凌波弄瑤草君方參同擁龍虎我  
欲治荒種梨棗會當月夜見龐眉一笑超然凌八表

張志

和自號為  
江湖釣徒

送趙子畫奉議歸睢陽用熊倅韻

紛華眩人劇朱碧子獨好書如好色王孫被服甚寒生  
射策君門先破的榮州書窟三萬卷錦標付此龐眉客  
南遊句吳北大魏亦復徒勞問刀筆不唯脣齒腐經史  
正自雲山鑠胷臆來來息交思簡事為子忘劬廢晨昔

春風滿帆送歸舸回首清游如昨日知君名駿定千里  
不待朝廷訪幽側有書時寄鴈南飛顧我漁樵正爭席  
同趙奉議離吳興江仲嘉與其兄仲舉送百餘里

醉中戲作此句一首

大江飲酒如澆灰小江飲酒顛如雷扁舟相送不道遠  
百三十里雲帆開云亭老人窮不死故園茅屋荒蒼苔  
闔廬城中一畝地已辨甕牖鋤蒿萊吳興上佐吾黨士  
十年縱賞西王臺眉間黃色裌綵服拖樓長嘯春風回

要須酩酊酬此別不離萬頃添金杯明朝相望即湖海  
縱有美酒何為哉

過毛達可友給事覽壁間舊詩次韻二首

堂前清颼發樹外赤日西坐令天壤間氣候忽不齊解  
帶席嘉蔭長哦壁間題故應有神護塵土不得迷前年  
款公門鸛鵲亦已啼今年復羈旅庭莎欲鳴雞西游有  
底急觸熱忘卑棲似為飢所驅不計轍與蹄綈袍意彌  
厚槃餐洗羹藜磊塊久不澆醪醪代朝蘼襄陽乏新句

夜直難相攜黃華非不佳寒澹每見少蕭蕭亦無言懷  
抱不自曉深嫌小桃天欲伴霜松矯窺叢慰寂寞時有  
南飛鳥主人真賞奇灌植勤便了徘徊傍東籬高興在  
塵表坐有白頭生臨風百憂繞

北固懷古

阿瞞長驅壓吳壘飲馬長江投馬箠英雄祇數大兒耳  
彷彿芒碭赤龍子幄中況有南陽客布衣躬耕無甌石  
當時鼎足計未成聊此一寄空赤壁人隨流水去不還卧

羊頑石留空山如今留石亦煨燼山與長江相向閒

秋華無幾尚有紫薇相對里巷間

晚花如寒女不識時世妝幽然草間秀紅紫相低昂  
木事已休重陰閱深蒼尚有紫薇花亭亭表秋芳扶疎  
綴繁柔無復粉豔光空庭一飄委已覺巾裾涼手中蒲  
葵筴雖復未可忘仰視白日永淒其感永霜

秋雨三首

細字忽難讀松窻失朝暉開簾視天宇屯雲凝如鷺霏

微乍噴灑翕忽看淋漓斯須建百川中庭即方池秋雷  
亦動地勢洶萬鼓輦虛簷忽無聲蒼狗變白衣飄搖露  
穹碧涼飈洗蒸炊雨師真解事作止適所宜

十日儼辰次如環了無端人言秋甲子畏濕不畏乾向  
來譙門道旁立三尺壇故勤壁間緣一起泥中蟠青衣  
躍且躁有如沐猴冠先聲忽灑道直此辰與干邇來未  
旬浹三見急雨寒黃流抹河草連檣度平瀾良苗有佳

色未覺千畝寬時暘亦須早無使江湖翻

頃年吳江大水  
斷長橋吳人相



傳為太

湖翻

華首三不過求田亦良圖莫嘆湖海士豪氣故不除扶  
犁本吾事二頃終勝無繞舍生蒿蓬閉門種英蕪從渠  
百尺樓笑此蝸牛廬吳中久卜鄰會從古人居荆溪一  
塵地儻與求羊俱屠門過大嚼一雨喜有餘正恐二三

子聯翩躡雲衢空令千里駕悵望黃公壚

林德祖周憲之皆居蘇郭

慎求田園  
在陽羨

過紅梅閣一首

春風如醇酒著物物不知能使死瓦色化為明艷姿寒  
枯出繁秀巧與節物期江梅故幽獨綽約不自持居然  
北枝後迨此白日遲春風日浩蕩醉色回冰肌清妍有  
餘態衆芳謝凡卑憑虛一回睇俯仰歲月馳所恨培雪  
根向來歲寒枝差池弄芳晚坐令顏色移顏色固嫵媚  
幽香無故時

題蔣永仲蜀道圖

梓州別駕真雛鳳賞古探奇坐飢凍要窺瓊蕊蔚藍天

直上潼江歷秦宋每逢佳節靜盤礴流出胸中九雲夢  
乾坤垓北本無迹我獨毫端發神用戲驅萬變寄陶寫  
軒豁端倪巧搏控蒼筠擢秀飽冰雪古榦撐空中梁棟  
奇礪那得在山谷回首何年委堅重輪囷偃蓋屈金鐵  
夭矯驚虬起巖洞春江莽蒼迷東西漢南老柳參差垂  
煙中遠近見木末明星已沒城烏啼平生險怪三峽水  
古木巖崕陰風吹石間雷電殷九地出入噴薄無窮時  
我身趺足半天下偃蹇故是山林姿南行瀟霍北嵩洛

應接不暇空狂癡作詩寫意如捕景況有三絕窮天機  
清晨對此恍自失眼中太白橫峨嵋請君十襲秘緹革  
恐復仙去歸無期

寄開化李令光

我行阡陌間苗麥已復青茅茨間新稿雞犬有和聲不  
見吏索錢田家得其生雞犬亦肥字不遭無事烹於斯  
可觀政豈在赫赫名父老亦相語驩然就春耕官租及  
時了卒歲樂無營

山間古梅林有鴉集其端不飛亦不鳴彈射莫敢干下  
窺羣雀雖啄顙創其肝欣然舐兩爪意得良自安飛來  
多凡鳥助此凶且殘安知萬山曲亦復鳴棲鸞相咻固  
不可見嚇技亦殫衆鳥既有恃相期在歲寒

園居荒蕪春至草生日尋野蔬以供匕飭今日枯  
枿間得蒸菌四五亦取食之自笑窮甚戲作此  
詩

平生囁嚅口出語無媚悅定非肉食姿賦分在藜藿僞

居得空園窮陋亦清絕分陰豈不惜飽睡送日月蕪菁  
不須種衆草今已茁朝來一雨過清細皆可掇東籬有  
更生杞狗僅堪埒乃知天隨生豈羨五鼎列堂堂不吾  
負茅甲破春雪縻身薦瓢簞解我憂思結薺花雖未繁  
著地爛於纈驚雷發蒸菌自可當夏鼈馬蘭亦芳脆人  
覓固凡劣晴朝當炙背俯僂事挑抉家人各盈檐汲井  
手自挈滿炊太倉陳侑以冬菹列盤中長闌干置饋每  
虛撒恨無穉龍苞此味那得闕長謠青青槐饒液想庭

樾妻孥覆相誚男子志勲烈君非老浮圖菜本可長齧  
況茲閒草木豈為刀匕設乃翁笑摩腹萬事付一呷此  
中有真趣勿為兒輩說

九月七日夜夢王元規詰旦其弟元矩適相訪感  
而作詩一首

故人入幽夢彷彿平生懷心知九泉隔意象慘不開哦

詩不成章慙恍誰能裁曰此蕭爽士寧當沒黃埃

夢中作詩

兩句似是此意然不記本語

清晨客在門乃自烏衣來典刑見難弟

共歎一息乖幽明不可詰此夢何為哉回觀南園道微徑已蒿萊

卜築西塢

和劉子厚南澗中題

出處初漫浪淹留失佳時時英盡珠璞寧復見誰差一去四十年伏櫪久已疲幸此歲將暮穿雲弄清漪窈窕煙塢中蒼陰晝森垂茲焉寄茅屋橫仄任所宜谷口翳杉竹柴門畏人知誰言一丘貉儻與汗漫期

寄茭湖江仲長

和柳子厚初秋夜雨贈吳武陵



急澗無止水秋蘭無故叢別來今幾年坐閱毗嵐風交  
親半鬼錄生者仍衰窮及茲過君家樽酒一笑同知我  
厭輦鼓煩君韻絲桐相攜步林壑暫覺萬慮空櫟社寄  
莊叟

謂自

醉鄉著無功

謂仲長

醒來百憂集尚寐期無聰

晨起梳頭髮白且稀有感

余髮已種種我懷亦依依風林無安巢寒日無餘輝束  
髮隨官牒前言服良規豈唯會計當自詭牛羊肥妄獻  
北闕書野芹安足希一挂邪士籍徒嗟寸誠微惓惓

畝志正作禍患機，羈危不如人行行。向知非世變，不可料  
風塵暗。王畿真人起白水，帝命式九圍。誤沐宣室召，白  
頭侍經幃。誰言螢爝光，敢近白日暉。誰言草木萌，敢試  
雷霆威。野馬立仗下，軒昂妄鳴嘶。升之老牛，卑無復瞻  
龍墀。天公了無私，與奪適所宜。時方急功名，選悞安所  
施。士方貴才辯，安用鈍訥為。常人與善士，何異於愚癡。  
譬之救焚溺，珮玉行逶迤。弃捐乃其理，刺天看羣飛。幸  
非高明室，百鬼浪見闕。自從伏嵎巖，風淫得偏靡。有足

不得行有手不得持每思林野娛濟勝憂無期堆砌不  
得往如驥繫且韉如盲不忘視如寒不忘衣如痿不忘  
起如羈不忘歸但願老窮健長甘北山薇豈復理鬚髭  
我冠待晨曦

自仲嘉云亡未始見夢舟行夜入吳興境有夢如  
平生感而賦詩四首

江子隘斯世脩然向方蓬一朝成千古寤寐不復通夜  
入雲溪境胡然見幽夢高標何所似俯仰風中松談笑

如平生炯炯雙方瞳去年經行地陳迹亦已空故應玄真  
老相與遊無窮

諸人久不死而使武子先斯言太癡絕愛惡無乃偏君  
看雅正情播在三百篇秦人哀三良百身寧可捐相鼠  
有深刺嗟哉胡不遇此豈感者歟加膝墜諸淵乃知孫  
楚狂未必非公言

世以勢論士君誠不如人揚揚乘軒者志滿氣甚振外  
見七尺軀中有萬斛塵鑿枘固難入鶚鸞豈相倫炙手

苟可熱行路為雷陳高棲冷如鐵骨肉不得親誰能獨  
無死榮辱久乃真

皇天非無知伯道固有後百年能復幾僅比一昏晝久  
知彭錢天不及殤子壽向來簞瓢生廟食至今侑東陵  
雖飽死千載有餘臭泉蕃得剗腸苦折漫遺馥試當問  
玄夫此理或可究

初到書局以萬七千錢得一老馬盲右目戲作古

句自嘲一首

蹄間三尋汗流赭九達雷電爭飛灑我窮那得騁追風  
正擬虺虺行果下平生畏塗飽經歷夜半臨深無馭者  
故應造物巧相戲却比盲人騎瞎馬李南知音當促步  
廣漢騰嘲不相假執鞭良稱塞翁見並轡聊從杜陵夏  
庖然病頽豈其類老矣問途那可捨徑煩一夫事刷秣  
似桂新芻不盈把向來伯厚亦安在結駟雞棲同土苴  
他年東去把掠風縱爾逍遙汴東野

晁無斁將之錄示近詩有和其兄以道說之詩次

韻以致區區兼簡以道

談詩如談禪練性如練墨

以道深於明理頗喜造墨

壯心悟龜毛少

作豈蛇足平生甚元龍未信今伯玉十年得投閒高卧

謝寵辱定知貧勝富固自平為福著書著名山會使山

鬼哭結廬近三休為米時一出猶嫌佛場選肯問燕臺

築俗人難與言鏡鬢遺盲禿前年客長安正覓三金粟

塵中一傾蓋爽氣岷峨綠別來更崎嶇寡陋嗟我獨塵

埃篋中書有手不暇觸

次韻寄謝公表韓公朝請

世人如鰓魚自蔽翻吐墨  
猩熊亦何罪不衛脣與足  
要當時木鴈安問定石玉  
向來休休翁老去稱耐辱  
迹高名自汙卒享清淨福  
肯為接輿生叩木妄歌哭  
韓公早聞道垢濁久已出  
終成九層臺不棄一簣築  
長安列戟第桐影將缺禿  
寧辭治中興且食祠宮粟  
胸中荆棘盡華髮當更綠  
抗塵我何庸勇退公所獨  
何如善刀藏聊放虛舟觸



和葉翰林送李從事

嘗音真兩難邂逅多契闊一朝間容刀三歲歌采葛古  
人抱修能初不露錐末誠令處囊中談笑堪式遏豈無  
識玉人顧恐鑠金奪遂令緇衣好歛迹裁自脫畫地杯  
已疏志鵠弓遽撥徒嗟湖海上髮白牙齒豁懷公劇海  
林念至失焦渴臨風賦新謠憂思不可掇

自寬吟戲效白樂天體

武陵謫九年下惠仕三已或窘如拘囚或了無愠喜吾

生憂患餘年忽及耆指偏痺未全安抱病更五禩進為  
心已灰弁置甘如薺坐狂合投閒佚老宜知止向令身  
安健不過如是耳每思古窮人我幸亦多矣照隣嬰惡  
疾羈卧空山裏纏綿竟不堪抱恨赴潁水文昌兩目妄  
無復見天地簡編既長辭游覽永無冀吾今雖抱病蹇  
曳非頓委時時扶杖行積步可數里校之卧牀席欲坐  
不能起雖扶不能行懸絕安可比時從親故談亦不廢  
書史右臂故依然運筆亦持七簋輿時出遊初不廢牢

體況無他證候色脉苦無異詳觀動息間儻有全安理  
侍祀了無慵竊祿愧索米借居浮屠宮非村亦非市廷  
堂甚爽塏高屋敞窗几郊林接溪水眼界頗清美嘗聞  
天地間禍福更伏倚藉令衰蹇身終老只如此何須苦  
嗟咨未必非受祉形如支離飽食逸終世目盲如宋  
人全生免徭使平生歎遠遊今我在桑梓田園接家山  
區處及耘耔平生困鞅掌今我恬無事寢興縱所如出  
處不違己病來益尊生對境空相似永無貪欲過稍習

衛生旨不為六賊牽豈受三彭毀人言病壓身往往延  
壽紀大鈞默乘除萬一理如是安全固自佳蹇廢亦可  
爾死生猶寤寐況此一支體細思安否間相去亦無幾  
如何不釋然萬事付疑始

贈別吳忱宣德

并序

余客都城邂逅河南吳誠伯偕寓興國僧舍其為人  
樂善嗜學練熟世故徙居蘄春適再世耳而蘄春人  
至都下者無賢不肖必來問訊其廬所傾下往往知

名士故舊有以急告隨所厚薄賙之誠伯自言尉光  
山時捕得強盜十許人賞應第一等獄具部送府盜  
親戚望哭道旁或扶老攜幼號戀不忍聞誠伯顧盜  
非素猾賊為人害者一旦迫飢寒適為盜乃陷重辟  
耳因以盜還送縣稍緩其獄久之皆得不死賞固不  
論也凡此過世俗遠甚今茲同寓僧舍者至數十人  
乃獨見親厚此又何也余調官東歸誠伯從余索詩  
為別匆匆不暇還家作此寄之

吳公河南守薦士得賈生偉茲天下士何止千人英吳  
公失名字功業曖不明要非萬頃陂莫著橫海鯨當時  
好賢意豈愧勃與嬰蔽賢如面牆自使兩目盲好賢如  
力穡穰穰嘉穀成至今餘慶在望著河南城如君豈其  
裔樂善莫與京高門二千石世德故可評平生周旋士往  
往凌青冥作史今十年讀書不求名向來光山政何異  
古所稱嗟哉士營己寧使我負人聊須借汝頭一用朱  
吾輪今君乃能爾所弃如毛塵故知古賢士尚見風俗

淳猗予一畸士落落良可憎折腰務求合俗眼竟不青  
憧憧九衢內銚迨蓋一傾何從乃知我頗有交舊情相  
隨若形影出語見肺腑長安速化地頑鈍終無營中宵  
起歸思襍被東南征投林無擇巢促步無安行寧嫌叢  
爾邑要是衆不爭紛紛同舍客聚散兩不停毛子去山

邑哦詩對崢嶸想見簿領間炯如九秋鷹

毛世高

深州戢

羽翮題輿重廬陵胷中若懸鑑圭角不自呈

上官閣中恢

石

老故游倦飄蕭數星星崇山古惡地無乃煩苔榜

音彭石典

宗振有子悉  
有時名早死

程翁頗專嘿兩版晝夜扁時時繫烏帽匹

馬挾二黥安知剎那間一卧不復興

程典之

其餘復誰在

誰與交忘形去駕雖結轍來檣競揚舲懷君尚留寓京  
塵染裾纓其誰念久要佐子飛且鳴况君緇衣後世故  
飽所更會當力推挽橫絕非階升却顧五湖上有人方  
耦耕

送林德祖致仕東歸

并序

壯而仕老而歸理也士溺於仕故困而知返病而能



休老而知止者世則猶然貴之若德祖於斯三者無  
一焉然去官如脫屣是乃真可貴矣德祖方未仕以  
學行有盛名四十起家至為部刺史所歷皆儒官入  
糾天府於今為要地年始登六十茹蔬飲水神幹儼  
如也一朝浩然有歸志退自府舍不謀於朋友不告於  
妻子夜半狀上府晨朝可命下斯亦奇矣余行道南  
徐過故人蘇子祖出許振叔書道德祖掛冠勇決之  
狀余時冒初暑向遠途忽忽煩憤聞之灑然如挹寒

流而濯清風也而或者疑焉余曰子無異也士溺於仕久矣其視爵祿猶飢者之羨膏粱渴者之赴水泉寒者之陽而暘者之陰也意若攀垂綆而上千仞不可湏臾置也今乃有人負通博之才居軒冕之會非有宜去之年不得已之事也然且一朝去之彼以夸覓之心計之是豈不可駭而疑哉且仕不仕向常之有德祖非為亢者也非要利者也徒曰適吾之適以遂吾之性而已雖然自砥節礪行之詔屢下所以愧

責貪競者之辭實深聖主之所望士夫之恥也今觀  
德祖之去就重輕亦足以振士風矣夫仕者畢心力  
以奉所職處者先廉退以風士類是皆有益於時者  
也德祖豈不賢遠於人矣哉既遇諸淮陰舟翩然東  
使人有冥鴻之歎因為詩以附諸公之末云

浩浩聲利間靜躁同一區排肩日中市有類逐獸趨中  
朝尺寸地衆睇咸睢盱安知大雲客出與飛雲俱翛然  
棄之去初不計卷舒紛紛軒裳士瞠目口為喏茫然更

歎息不間賢與愚乃知楊少尹未足繼兩疏時當老而傳不失仕且居非同會稽史苦誓困簡書不比狂季真索身憂病餘耆年了無事方當騁亨衢投簪逸湖海沛若縱鰐魚雖無揮金事日者誰公如清風激多士故是明時須恨無采詩氏儻有東歸圖

餘杭法惠院荆文公書堂文公康定中讀書於此鍾山太傅起從龍鼓動風雷指顧中未見圖形求傳野豈知徒步客新豐青鞵曾訪餐芝老

許遠遊登嵩茹芝乃餘杭山中也

白首唯餘擣藥童

寺僧言文公多養疾此堂當時給侍童子今八十餘歲矣

藏壁故

應留斷簡至今山鬼慟悲風

送蔣主簿入都赴試一首

東南貢吏紫髯郎一馬駸駸客路長袖裏山林洗塵霧  
腹中文字了縑箱流年過我長如許樂事知君詎未央  
行恐飢來驅我去也遮西日上河梁

將有名畫小軸常置懷袖名壺中圖

罷吏客郡城已數月滯留忽已歲暮浩然興歎作

一首

一行作吏向吳城五見娵隅上薄冰魏覲三章堪自約  
殷源百尺敢言登抑撇祇送人為郡噓媚初非我負丞  
鞅掌棲遲俱害性不知鬚髻欲侵凌

寒夜遣懷一首

強醉重雲欲散鹽三更飛霰忽驚簾大呼何與癡人事  
此意多應俗士嫌出戶仰看天漫漫持盃愁作夜厭厭  
消除心事都無處下盡中軍三百籤

許主簿見和過有推借再作奉呈

身謀自昔須三窟世味端能敗一薰醉裏閒愁濃似酒  
春來歸思亂於雲松栽咫尺傳盧老棗實方將訪許君

見許遠遊與  
王逸少書

却喜雲孫共來往扁舟時入白鷗羣

用前韻作招許主簿

風騷無復見黃初尚想應劉載後車病骨不知緣底瘦  
愁眉時得為君舒動人春色來隨鷺入眼溪流靜見魚  
祇有此中多好句可來茅閣試憑虛

謝江仲舉惠酒

山城無物可忘憂，但有平原病督郵。  
知我囊中無白水，煩君若下出青州。  
芳甘未謝三年醞，傲兀能消萬古愁。  
會待東郊春意動，鳴鞭乘興草堂遊。

次韻張祠部敏叔游滄浪蘇子美故園

醉倒春風載酒人，蒼髯猶想見長身。  
試尋遺址名空在，却歎張羅事已陳。  
稍置曲欄穿徑竹，別開高閣俯汀蘋。  
拏舟更欲陪清賞，要看毫端藻繪春。

哦詩夜坐餅壘久空無，以自勞寄吳興趙司錄江



兵曹

詩成不直一杯水  
年大常懷千歲憂  
何須中令能強記  
正要將軍為破愁  
故人久負丘壑志  
公子欲尋梁宋游  
相逢儻有蒲萄淥  
肯向西涼博一州

九日寫懷

節物驚心兩鬢華  
東籬空繞未開花  
百年將半仕三已  
五畝就荒天一涯  
豈有白衣來剝啄  
亦從烏帽自欹斜  
真成獨坐空搔首  
門柳蕭蕭噪暮鴉

高適九日詩縱使登高抵斷腸不如

獨坐空  
搔首

窮居苦雨

慢膚便腹轉疎慵  
睡足茅簷目過鴻  
墨客縱令三尺喙  
木奴何似十年功  
門前羅雀非吾病  
竈底生蛙不世窮  
舊雨未乾新雨漲  
可憐愁絕力田翁

避寇村舍

再脫兵戈裏  
全家走路塵  
百年同是客  
萬事不如人  
幻境終歸盡  
生涯正要貧  
故人知在否  
魂斷楚江濱

寇至之日

江子支趙叔問適泊  
舟江口未知今在亡

和答何蒙聖刪定

曾中林壑寄商顏門外紅塵了不開年去人猶昔人耳  
身游才與不才間與君同覺夢中夢顧我長嗟山復山

何日方舟歸里社韋編應許試窺班

蒙聖深  
於易學

和江仲嘉見寄

華門蓬舍不知春車似雞栖甑有塵千里傳情望雙鯉  
一杯和影祇三人交親離合同巢燕身世羈危獨繭綸

四體不勤心擾擾擬將玄旨問吳筠

江修練故有此句

酬穎昌葉內翰見招

觸熱西遊汴濁波京華旅食謝經過年侵鏡裏今如此  
歌缺壺邊可奈何賓閣遙知懸玉麈直廬應許到金坡

唐孟浩然故事

須公一節趨環召猶及昆明百步荷

旅舍寫懷

半世江湖寄此身冰墟何意及陽春離騷痛飲非名士  
疑段還鄉亦善人病木作花真強活長魚沈陸恐摧鱗

清時英俊如麻葦敢歎長年甌有塵

林德祖有詩寄光祿蔣卿夢錫璣及送朱博士駿

發終篇皆見及此韻寄懷

閉門那復賦三都傳世何妨強著書東海遺榮行路歎  
南山歸隱故人疎尚平婚嫁無餘累摩詰身心即淨居

六十挂冠雖早計絕勝銜索泣枯魚

聞德祖兒近已娶婦故有尚平之句

金華玉府九天開夜誦何人薦逸才太學諸生終莫挽  
長沙賢傳幾時來別離有恨空魚素歲月如飛逐管灰

亦欲相追老湖海稽山肯放酒船回

德祖既休致不復作都城書余獨時

致書問訊故有空魚素之句

### 和江子我端友

雨脚初收曉霧開青鞵布襪好追陪幽人無事長相見  
佳句有時還自來白業誰能超石壁朱顏亦任發春醅  
憂來忽憶燕南信安得闌鄉老萬回

### 別後有懷子我追用巾字韻作寄

漉酒空栽五柳巾一觴相屬念情親玉川奴婢今猶昔

錦里田園老更貧  
冰洞清泉誰共酌  
風篁幽徑好尋春

開年晴暖須歸去  
還向江湖覓故人

子我東去云欲居無錫或過錢塘故

有冰洞風篁句

鄭希尹大夫會吳中諸老唯方子通不至余作詩

呈希尹

黑頭新貴擁朱輪  
交會耆英久不聞  
博識猶多漢郎吏

敦詩仍有晉將軍

一作惻惻無華漢郎吏詩書執禮晉將軍

河流曲曲靈光

異芝蓋莖莖瑞氣芬

是日九人

坐想城東隱君子  
無心間似

嶺頭雲

張敏叔祠部章伯成戶部餘皆員郎故有郎吏之句張仲謨嘗帥熙河故有將軍之句

會稽旅舍言懷

北山之北寄柴扉茅屋參差倚翠微  
老罷那知還作客春來無奈苦思歸  
淹留恐復荒三徑潦倒寧堪扈六飛  
乘鴈雙鳬成底事不應容易裂荷衣

次韻江子我見寄長句

余時初忝秘書少監

泥行正作龜藏穴霧隱初微豹一斑  
豈有高標如冠玉况無談舌解連環  
一登文石趨宣室三竊蟠桃向道山



早晚共尋雞黍約林泉猶得半生閒

山近

山近雲多態身閒夢亦幽紙窗先得曉布被最知秋  
海眼來陰冷雲根逗暗流結茅容我卜投老為君留

丁巳九日攜酒要叔問登道道門樓而江彥文寄  
玉友適至因用己未歲吳下九日詩韻作

涼秋風物正清華極目高樓不見花老境固知無樂事  
醉鄉聊欲寄生涯銀鈎遠寄清桐滑玉液親題赤印斜

笑引壺觴成一醉歌筵遙想髻堆鵝

聞孝文是日有咸集

戊午歲九日復與叔問登城樓再用前韻作

兀坐空哦服九華衰顏深覺負黃花但令無事長相見  
敢嘆百年生有涯雉堞曉登千嶂抱縠波秋淨一溪斜

歸來更展新詩卷醉墨淋漓似老鵝

盧仝有却來紫上翻墨汁塗抹詩書

如老鵝之句

茸蝸廬吳下用葉翰林見寄詩韻作

四海無廬置此翁故營松竹儘囊空明知計出栢馬下

正擬身全木雁中東郭已成生草舍南村先怯卷茅風

向來豪氣今如此敢與元龍較長雄

張志和結廬東郭  
茨以生草余結廬

皆竹橡松柱故  
有松竹之句

和白樂天二首寫懷仍效其體

莫把著龜更問天向來心事已蕭然塵中惝恍常如失

夢裏呻吟半不眠三徑松筠終問舍五湖煙水不須錢

艾耆相去能多少早擬懸車十五年

中臺退食每逡巡不向重華即淨因豈但語言都少味

亦知才術不如人五雲華闕通閨籍萬里煙波擲釣綸  
鳬雁去來何足道從容居士宰官身

和趙子雍游石園

長嘯西風一散襟重陰疎影靜相臨水通笠澤秋容淨  
竹種玄池野思深石磴埽雲留晚步松谿隨鶴盡幽尋  
舊遊回首成春夢太息憑誰寫寸心

太湖公檄西原道即事三首

司空山頭朝出雲西源渡口十里陰煙中雞唱未及午

白雨作泥泥已深

上崖下谷鳥道中前屨後巾魚貫從西山路暗光已夕

東山山頭餘日紅

道旁甕盎如汝陽石間電電如呂梁不知身世在何許

舉頭四山鬱蒼蒼

登富陽觀山亭

橋公宅中木參天孫郎山前春燒煙大橋不向五湖去

建康宮深空幾年

題蔣崇德彞所藏明皇夜遊圖

燃膏飛控逐流光  
露溢金盤樂未央  
擬跨八龍窮轍迹  
誰令一馬向銅梁

七夕

阿母雲車下建章  
茂陵秋草竟荒涼  
漢庭卿相如麻章  
只數窺窻陞戟郎

胥門老蔡定凡仙  
會有神人與作緣  
自笑塵容滯窮骨  
不如雞犬上青天

江仲嘉行邑將歸見寄絕句次韻

骯髒江公故不羣  
八關三窟斷知春  
喜談狗馬從無鬼  
獨抱冰霜似此君

常嫌小知漫閒閒  
曠度蕭然只愛閒  
不借黃梁留客醉  
嚴關三鼓款銅鑲

勸農行稼亦看山  
牛驥何妨共一閒  
應笑云亭老頗僻  
背崖無地結三間

漾漾扁舟拂水飛  
飄飄蘋末細吹衣  
傳呼西地來連壁

東郭人知典午歸

仲嘉行縣歸司錄趙叔問迂之南門聯鑣還府率以為常

詩城端欲據天山酒戶猶能敵飲仙幽事相關公事了

如屏千嶂翠連綿

### 三峰草堂

庭前雙梧一畝陰禪房蕭森花木深清霜脫葉空山響

夢覺寒窻松月林

雨洗千山翠欲浮稻畦松澗已爭流朝來風急凝雲盡

歷歷鐘聲過五州



避寇儀真

北固山頭豎白旗西津渡口僕姑飛將軍笑引三千騎

洗馬鵝翎間道歸

是日聞浙西總管提兵自瓜洲取道儀真度長蘆便道趨杭

茅茨低小對青山准擬餘年向此間南望青山是黃鶴  
欲憑黃鶴寄書還

戲題畫卷

五載京塵白髭鬚丹青遐想寄衡巫如今埽迹長林下  
却對真山看畫圖

胷中雲夢本無窮，合是人間老畫工。  
常恨無因繼三絕，倩人拈筆寫胷中。

答和江子我

長江衮衮葉蕭蕭，心與虛空自寂寥。  
過眼文書風度穴，迎秋衾枕帶移腰。

柳標橫擔入亂山，恍如黃鶴倦飛還。  
不妨步屨時來往，山北城南一望間。

駐蹕揚州以提點刑獄公解為尚書省禮部在西

北隅卷書樓下甲戌年余嘗寓止焉今寓直其

下感賦

三入南宮更白頭夜寒持被卷書樓那知跼足半天下  
投老浮山省舊遊

戲題郭慎求所寄書尾

老罷歸來寄一廛交親南北散如煙誦君雪暗天涯句

離合升沉二十年

慎求為海州幕官行縣嘗有詩云曉鳥啼啞啞遊子初去家去家向何許

雪暗天一涯云云斷句云舉頭語天公慙慙推日車頗為吾黨所推

題叔問燕文貴雪景

一壑回環十二峰茅茨送老白雲封如今塵裏看圖畫  
却愧當年邴曼容

新作紙屏隆師為作山水筆墨略到而遠意有餘

戲題此句末句蓋取所謂柴門鳥雀噪游子干

里至也

時守秀州屢乞宮  
觀歸山居未遂

急雨初收山吐雲清溪曲曲抱煙村拋書午枕無人喚  
歸夢真疑鵲噪門

會稽喜得家書

黃耳東來一破顏  
直從松竹報平安  
遙知雲頂峰前住  
霜鬢風篁六月寒

試端溪古硯偶書二首

白首重來祇厚顏  
有懷端欲向誰傳  
語言相對都無味  
色在蜚鴻落照邊

人生當復幾兩展  
我飲寧須三百杯  
破硯猶堪磨老境  
醉拈椽筆埽霜煤

即事

雲裏琤涼十九泉  
茅茨深寄白雲邊  
何年斷取仇池境  
擲過荆吳萬里天

偶作三首

薰風習習動林光  
紫翠陰中草木香  
山鳥一聲清晝永  
白雲深處北窻涼

老向甘泉補侍臣  
歸來還作卧雲人  
一重一掩藏煙塢  
三沐三熏屏世塵

誰遣生駒玉作鞍  
春來首宿徧春山  
自知不入黃麾仗  
振鬣長鳴出帝關

書壽昌驛

歲暮白日速  
風高黃葉稀  
歸心與寒鴈  
一夜向南飛

和翁秘監彥深喜絕句四首

朝來喜氣溢層霄  
側聽封人共祝堯  
密雪正應歌九扈

疾雷先已破三苗


時初珍  
陸寇

即看新綠歸千畝  
還見陳紅積九年  
便覺雨暘如有意

不須花草苦爭妍

九重誠意格天闕  
一夜風回萬壽山  
銀闕瓊臺迷遠近  
真疑羣玉接蕭閒

風鈴相語紙窻鳴  
拭縮飢鴟凍下驚  
却憶剡中高興盡  
雪消江草喚悲生





宋詩鈔卷五十六

欽定四庫全書

集部

宋詩鈔卷五十九

詳校官中書臣賈鏊

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷五十七

內閣中書舍人吳之振編

吳儆竹洲詩鈔

吳儆字益恭初名偁避秀園諱改名登紹興二十七年進士調明州鄞縣尉歷官至朝散郎知邕州軍州轉泰州乞祠主管台州崇道觀卒于淳熙十年謚文肅當時朱子及張南軒呂東萊陳龍川范世湖葉水

心陳止齋諸公咸與友善其自邕而入對也南軒書  
孔子之剛曾子之勇南方之強三章以誌別嘗作尊  
己堂記朱子見之喜曰往者張荊州呂著作皆稱吳  
邕州之才今讀其文又見其所存其為聖賢所許如  
此四方從學者尊為竹洲先生

吳子既結茆竹洲以娛親復於居之前治為亭以  
朝爽名之蓋亭西面於晨興看山為宜

抱甕自灌園勝游貴人門有口自酌酒勝與俗人言園

中多蔓草晨夕費鋤芟遇夜或風雨安得久盤旋村酒  
不常有有亦多苦酸而况醉中語繆誤人所嫌不如飽  
喫飯清風北窻眠眠多則無覺夢境仍多端惟有古斷  
簡言行皆聖賢讀之未竟篇眇昏如夢間讀竟亦何為  
聚訟徒喧煩厭煩以靜勝又類枯木禪握苗不耘苗亡  
羊兩茫然何如池上亭虛曠可看山山色日夕佳晨興  
夜氣還宴坐日過午清陰猶未遷西山倦挂頰南山興  
悠然晚山雖好不遮日誰能觸熱望長安

和孫先生彦及棣華堂詩韻

伏蒙頒示棣華堂詩引援古今發明大義使學者知  
不徒事汗墨而已讀之凜然增手足之愛佩仰厚賜  
亡以為喻輒依元韻亂道拜呈

大雅久不作聲色淫淫鄭紫古來非一秦焚厄故如此西  
都盛經學聚訟自茲始建安委道真典午事玄理錦藪  
蔚雲霧組紉亦信美後生不著眼千古空信耳誦習號  
純儒曠達稱高士有如富賈賈多歲不能使又如病酒

狂沉酣糟粕旨源流日以遠循襲不為耻先生秉大雅  
江東今夫子持身不夷惠漫仕無愠喜學術心自得筌  
蹄視經史蘭舟翼桂楫巨川端可涖我家世從公公欲  
出泥滓愚不堪世用非人不我以破屋蔭蓬根春薺老  
墻址寂寞誰肯顧公獨不我鄙遺之珠玉篇諄諄說友  
弟直欲障頽波肯與為茅靡觀公用意處可與召穆比  
弟兄吾手足父母吾怙恃盡此菽水歡還勝有酒醑古  
來願為兄日月不可弭聖賢師百世河海濶千里公如

大醫王一世膏肓起

寄題鄭集之醉夢齋

利欲醺人心濃如飲醇耐沉湎死不休寧論千日久豈  
知糟丘中醒狂亦時有天地育萬彙亦各賦匹偶人情  
豈相遠好惡隨妍醜集之年方壯濯濯春日柳性獨與  
人殊無婦奉箕帚丈室誇醉夢作詩詔朋友古來醉夢  
人亡羊孰先後寒儒醉糟粕酸澁寧可口莊生夢蝴蝶  
幻境徒紛糾富貴得志士列屋羅螭首象牀縶錦幄踈



綺深朱牖酣寢喚不醒鼻息春雷吼梅花霜雪安紙張  
蔬筍臭問君有何好甘作老鰥叟窮狀徒累累鴛鴦債長  
負負猶如荷旂人難論純綿厚但問雪煎茶何如羊羔  
酒

汪叔耕見訪不數日別去惡語為贈兼簡子用子  
美二友

負勢得老窮掃軌事幽屏茫然羅雀門有客頽而整悲  
歡十年別樽酒清夜永妙句時驚人盈軸肯傾廩三日

語未休霜寒夢歸省臨流分別袂波光照孤影重念吾  
故人雪屋清燈冷劉子抱遺經深井級脩綆曾子中庸  
學天理窮性命老驥鼓不作褰旗望公等天晴風日佳  
何時過魁徑石鼎然豆其冰菹煮湯餅

題陳仲禮四知軒且當折柳之意

陳侯一世豪筆力萬人敵卧之百尺樓平眎劉元德收  
歛湖海氣一室僅容膝平生不欺心自護如拱壁客來  
問字細論文旋糴官梁買酒樽夜深四壁冷徹骨酒酣

一笑溫如春三年官滿何所畜滿船稚乳書幾束長安  
侯門高於天束薪炊米桂炊玉問君持此將安歸君言  
歲收可百斛吾儕本無膏粱念況今老矣其何欲宰相  
時來則為之切莫倒行夸食肉

寄題淳安陳令君讀書林

能吏事深刻商利謹毫釐俗吏趨期會簿書自羈縻寥  
寥絃歌聲千古空餘思還淳山水邑令君丘壑姿邑民  
本無事君亦何所為治已物自治化行風漸移君復何

所欲讀書常不足挂腹五千卷  
挿架三萬軸曾未出毫芒  
萬室已蒙福堂東松竹林  
昔時秘荒榛堂中燈燭光  
昔時照紅裙今何聲吾伊  
蕭蕭風雨晨問君有社稷  
亦復有人民奈何獨自苦  
學道則受人

陽村道中邂逅趙仁甫

脩途轉清溪孤村帶寒月  
瀟灑竹間亭意行成小立  
賓主莫誰何悠然良自適  
俄有貴公子胡驄搖寶勒  
下馬相勞苦呼酒道疇昔  
遂令麋鹿姿頗為人物色  
佳實進

霜堅異釀引寒碧興盡還獨歸沙頭寒月白

題祝聖寺浮梁道中

金碧照征涂松竹開幽徑山僧壽八十腴貌偉視聽囊  
鉢罄錙銖棟宇視嚴整如公方外人眎世一泡影辛勤  
畢此生更欲傳不泯當家第父菑居位蠹國政眎公豈  
容誅三歎發深省

題古巖舊嘗侍孫先生題名巖中二首

白日瀟瀟松徑靜江渠冉冉洞門深風涵廣宇生虛籟

夢破西山上夕陰景物眼前渾似舊塵埃題處忍重尋  
羸驂落日孤村路塵土依然滿病襟

覆簣一拳進嵌空百肘寬僧房因石室蟻穴夢槐安塵  
路十年別松風六月寒淒涼舊題處不忍更重看

過叢桂堂故叔祖教授讀書之所

古瓦頽垣迹已陳孤猿別鶴自哀吟可憐叢桂烟蕪沒  
惟有一池春水深秀木千章新過雨寒山一帶暮傷心  
清風明月時來此夢斷雲飛何處尋

送洪史君赴闕移節會府

史君文彩漢相如  
暫向明時綰左符  
為郡似家身似客  
視民如子吏如奴  
魯公金石光千古  
吏部文章妙兩都  
戴白垂髻相與語  
如公治行向來無

拾梧子

雞犬三家市蓬蒿  
一畝宮春盤厭筍  
蕨秋子積梧桐客  
夢五年過文盟  
千里同時清臺省  
貴衮衮看諸公

送錢虞仲兄弟

燈火相從總角初，只今已是十年餘。  
窮愁懶漫吾猶故，文采雍容子甚都。  
借連璧肯來同寂寞，歸鞍寧不少躊躇。  
風流一別應如雨，儻有來鴻細作書。

和呂守環秀堂三首

久合鳴珂上九門，一麾猶許飽看山。  
豐年諸縣公事少，燕寢清香兵衛閒。  
鳥度屏風明水鏡，雲生畫棟擁螺鬟。  
向來蛛網蝸涎污勝處，豈非天地慳。

一州如斗帶溪山，空翠家家遶畫欄。  
丘壑自非曾次有，



雲煙誰暇靜中看  
衣冠共識家風在  
閭里方知漢法寬  
戴白垂髻相與語  
今年有飯飽加餐

田家但識豐年樂  
見說花城日更長  
如獲從公時拄笏  
尚能援筆侑飛觴  
雞豚社甕年年酒  
柿栗園林樹樹霜  
更倩漁郎問樵徑  
深山深處是吾鄉

休日飲直之運屬家

天與吾人臭味同  
一官落魄郡城東  
偶逢休暇追鳬鷺  
閒拂塵埃勘鼎鐘  
適意不知華袞貴  
醉餘聊看舞裙紅

金安上卷之三  
卷五十七  
只愁寒漏催羣動又踏朝靴逐曉風

次徐令韻

少日曾披九虎闕誰憐投老却乘邊貳車漫說半刺史  
多稼惟欣大有年榆柳闕河無犬吠牛羊阡陌斷烽煙  
玉闕人老知無用廟算如今出萬全

清明陰雨呈同舍

薄薄輕寒作許陰村村花柳為誰新良辰欣見百五日  
冠者仍餘五六人冷雨淒風連午夜飛花流水一年春

窺園未阻江東興陌上應多翠黛顰

弋陽道中

積雨今朝霽東皋晚日紅人家深蔽樹野水濶浮空久  
客仍行役青春已過中嶺頭人望處腸斷白雲東

偶成

晚來一雨破炎蒸蕉葉葵花照眼明稍與燈花尋舊約  
却嫌庭樹作秋聲

寓壺源僧舍三絕

風簷浙浙褪新青書展殘燈翳復明讀罷離騷還獨坐  
此時此夜若為情

悶來掩卷已三更風露涓涓月滿庭閒撲流螢衝暗樹  
危梢點點墮寒星

歸來閉戶還高枕牕隙微通月影斜風急忽驚烏鵲起  
空堦藪藪墮松花

宋詩鈔卷五十七